



Imm. 60: Piniakkat killilersukkat avanersuarmi Ittoqqortoormiinilu killilersorneqarunnaarnissaat anguniarlugu apeqquaqat aallaavigalugu oqallisissiaq.
(Inatsisartunut ilaasortaq Jens Napātōk', Partii Naleraq)

Piniakkat killilersukkat Tasiilami nunaqarfiinilu killilersorneqarunnaarnissaat anguniarlugu apeqquaqat aallaavigalugu oqallisissiaq saqqummiuppara.
(Inatsisartunut ilaasortaq Jens Napātōk', Partii Naleraq)

Demokraatini qutsavigaarput siunnersuuteqartoq, Jens Napātōk', Partii Naleraq, apeqquaqat aallaavigalugu oqallisissianik siunnersuuteqarnera pillugu.

Demokraatini isumaqarugut kikkut tamarmik inuunertik akisussaaffigisariaqaraat inuulluataarutigisinnaasaminnik inuutissarsiutissaminnik toqqaanermikkut. Aamma aalisartuuneq piniartuunerlu toqqaarneqarsimappata.

Demokraatini isumaqarpugut aalisatut piniartullu eqiasuittut inuulluataarsinnaasut isertitaqarluartarlutik, innuttaasunut allanut allanik nunami inuutissarsiuteqarniarlutik toqqaasimasunut naleqqiullutik.

Kalaallit Nunaata eqqaani imartaq angisoorsuuvoq aamma uumasorpasuaqarpoq.

Kalaallit Nunaat ilaasortaavoq imaluunniit allanut tunngatillugu suleqatigiiffinni allani sinniisoqartarpoq. Assersuutiginnaavarput nunarsuarmi piniagassat pillugit sulinaqatigiiffit Nunat tamalaat Arfanniarneq pillugu Ataatsimiititaliarsuani (IWC), Atlantikup Avannaani Miluumasut Imarmiut pillugit Ataatsimiititaliami (NAMMCO), Atlantikup Avannaani Miluumasut Imarmiut pillugit Ataatsimiititaliami (NAMMCO), Qaqortat Qernertallu pillugit Ataatsimoorussamik Ataatsimiititaliami (JCNB). Aamma Kalaallit Nunaata suleqataaffigaa Nannut pillugit Ataatsimoorussamik Ataatsimiititaliami (JCPB), aamma Washingtonimi Isumaqatigiisummut (CITES).

Taakkunani suleqatigiiffinni pisassiissutissat isumaqatigiisutigineqartarput. Pisassiissutit pillugit isumaqatigiisutit saniatigut allatigut killilersuisoqartarpoq, Kalaallit Nunaata ataqqisariaqagaanik. Assersuutigalugu EU-mi neqinik eqqussuineq killilersungavaoq aammalu sanalukkat uumasut aalajangersimasut tuungaavinnik sanaat, taamaasilluni pisassiinerni killilersuinissaq iluatsilluarnersinnaaqullugu.

Pissutsit taamaattut aalisartut piniartullu inuunerminni atugaannik sinaakkusiipput. Aalisartut piniartullu tunngaviusumik isumaqataapput pisassiisoqartarnissaanut, piniagassat killeqartillugit aamma immaqa piniarpallaarneqartillugit. Aalisartummi piniartullu akisussaassuseqartup kissaatiginngilaa piniagassamik nungutaanissaat.



Pisassiissutit pillugit isumaqatigiinnginnerit pisarput aalisartut piniartullu ilisimasaat tusaaneqarsimatinnagit suleqatigiiffinni pisassiissutit isumaqatigiinniutigineqarnerannut atatillugu, qulaani taaneqartutut aamma taamaasilluni ukiumut pisassiissutit kalluarneqartarput.

Demokraatini isumaqarpugut aalisartut piniartullu ulluinnarni atuisutut angisuumik eqqortumillu pisuussutit uumassusillit pillugit ilisimasaqartartut Pinngortitaleriffimmi ullumi ilisimasatut katersorsinnaasaanut aamma ilisimaneqartunut naleqqiullugu pissutaalluni Pinngortitaleriffiup killilinnik sulisoqarnera aningaasaqarneralu.

Aalisartut piniartullu ilisimasaat ilisimatuunit ajornerunngimmata ilisimatusarnermullu ilapittuutaalluarsinnaanerit suliniutit Pisunatut ittuni uppersarsineqarnikuuvoq. Suliniut Pisuna Naalakkersuisut ataanni suliniutaavoq siunertaalluni piniarnerup piniakkallu aquneqarneranni piniartut tusaaniarneqarnerusarnissaat. Suliniummi taamaasilluni siunertaavoq piniartut piniartakkamik aquneqarnerannut atatillugu aalajangeeqataasarnissaminnut periarfissagissaarnerunissaat.

Suliniut PISUNA nunarsuarmioqatigiinnit nersorniarneqarpoq, tassa 2018-mi Nunat Avannarliit Siunnersuisoqatigiit avatangiisinut nersornaasiuttagaa tunniunneqarmat. Aamma inassuteqarnermut atatillugu Pinngortitap pisuussutaanut siunnersuisoqatigiit PISUNA isigineqarpoq pingaarutilittut pinngortitamut taamatullu pisuussutit uumassusillit qanoq akisussaafigineqartarnerannut ulluinnarni atuisut akisussaaqataatinnerisigut.

Siunnersuuteqartup iserfigaa Kalaallit Nunaanni aqutsivinnit assigiinngitsuniit Danmarkimi ilaqquttanut tikaagulluup neqaanik nassiussisinnaatitaaneq. Innuttaasut assigiimmik periarfissaqartinneqanngillat pineqartillugit tikaagullit, innuttaasut Tunumiugunik tikaagulluup neqaanik nassiussisinnaanngimmata paarlattuanillu Kalaallit Nunaata kitaani najugaqartut nassiussisinnaallutik.

§ 37 naapertorlugu Justus Hansenip, Demokraatineersup apeqqutaanut Naalakkersuisut tamanna assigiinngisitsineq uppersarsarpaat. Tikaagulluup neqaanik avammut nassiussisinnaaneq pillugu apeqqut normoqarpoq 2017-285. Neqimik nassiussisinnaaneq pillugu assigiinngisitsisoqarneranut oqallinneqarnera iserfigissavara.

Oqaatigerusupparali Tunumi piniartut isumaqarmata, Pinngortitaleriffiup naliliineranut naleqqiullugu Tunumi tikaagulleqarnerujussusoq, taamaattumik amerlanerunik pisassinneqartalernissartik kissaatigaat.

Aamma taamatut oqarput Kalaallit Nunaata Avannaani piniartut.

Taamaattumik Demokraatinut pissusissamisoorpoq oqallisigissallugu piniartut ilisimasaat taamatullu immikkoortuni pineqartuni piniagassat naliginnaasumik aquneqarnerinnut naammattumik peqataatinneqarnissaminnut ilumut periarfissinneqartarsimanersut? Demokraatini isumaqarpugut aalisartut aamma uani suliami taamatullu piniartut ilisimasaat naammattunik tusaaniarneqartarsimanngitsut, nunarsuarmioqatigiit suleqatigiiffiini pisassiissutissat isumaqatigiinniutigineqarnerannut atatillugu taamatullu pisassiissutissat naliginnaasumik aalajangerneqarnerannut atatillugu.



Taamaattumik Demokraatini Naalakkersuisut kaammattussavagut suliniut PISUNA Kalaallit Nunaanni immikkoortunut tamanut siammerteqqullugu. Aalisartut Piniartullu ilisimasaat pisuussutitta uumassusillit aqunneqarnerannut atatillugu atorneqarnerusariaqarput, taamaasilluni pisuussutitta uumassusillit aqunneqarnerat ilisimasaniq tunngaveqarluarnerooqqullugu ullumimut naleqqiullugu.

Taamatut oqaaseqarluta uunga apeqquteqaat aallaavigalugu oqallinnissamut siunnersuuteqartoq qutsavigaarput.